

## REGIONAL NEWS

HEADLINES:-

1. Mizoram Lok Sabha bial inthlanna a vote tlate Thawhlejni a chhiar turah naktuk zing hian counting official-te awmna tur siam fel a ni ang.
2. Special Court (Prevention of Corruption) chuan eiruk thila thiam loh a chantir CADC chairman hlui leh a fapa bakah deputy chairman hlui hremna naktuk hian a puang dawn.
3. Lok Sabha inthlanpui thawh khatna neih ruala state assembly inthlan neihna, Arunachal Pradesh-ah BJP-in sorkarna an siam dawn a, Sikkim-ah rorellai Sikkim Krantikari Morcha hneh takin an tling bawk.
4. Prime Minister Narendra Modi-a hovin Cyclone Remal-in hmar chhak biala chhiatna a thlen dan thlirlet a ni.

&lt;&gt;&lt;&gt;&lt;&gt;

COUNTING OF VOTES

April ni 19-a Mizoram Lok Sabha bial inthlanna a vote tlate Thawhlejni zing dar 8 atanga chhiar tan turah naktuk zing hian counting official-te duty-na tur siam fel a ni ang.

Election department hotute hnen atanga thu dawn danin naktuk zing dar 5 hian counting official-te vote chhiarna dawhkan tur software hmanga chinfel (randomisation of counting officials) a ni dawn a. Hemi hnu hi chuan Thawhlejni, June ni 4 zing dar 8 a vote chhiar tan thei turin ruahmanna engkim peih fel a ni tawh dawn a ni. Vote chhiar tur hian Returning Officer, Assistant Returning Officer, Counting Supervisor, Counting Assistant, Micro-Observer leh vote chhiar hna a tangkai tur dang, an vai-in mi 2,000 thelhin vote chhiar hna hi an thawk dawn a. Vote chhiarna hmunte hi venghimtute'n thua thumin an veng dawn a ni. Counting centre hi 13 a awm dawn a, 3 chu Aizawl district ami a ni a, a dang zawng chu district 10 hmunpui-ah pakhat theuh a awm ang. Assembly bial 40 tan Counting hall 40 a awm ang a. Vote chhiarna dawhkan 379 a awm bawk dawn a ni.

Vote chhiarna dawhkan pakhat zelah hian counting supervisor, counting assistant leh micro-observer te an awm ang a, Election Commission of India in Observer atana a ruatte'n an vil bawk ang. Aizawl centre-ah te chuan zing dar 8-ah postal ballot a vote tlate chhiar tan a ni ang a. Darkar chanve hnu-ah Electronic Voting Machine (EVM) a Control Unit a vote tlate chhiar chhonzawm a ni ang. District hmunpui dangah erawh chuan EVM a vote tlate dar 8 atanga chhiar tan nghal tur a ni. Assembly inthlanna-ah khan assembly bial khata polling station pakhat zel a EVM (Control Unit)-a vote tlate chu VVPAT a vote neite'n an vote-na lehkha them lo chhuak nen a inmil em tih endik vek a ni a. Lok Sabha inthlanna a vote tla chhiarna-ah erawh chuan assembly bial khata polling station 5 zelah EVM a vote tla leh VVPAT a lehkha themte hi a inmil em tih endik vek tur a nih avangin vote chhiar hun chung a tirei deuh dawnah ngaih a nih thu Election department hotute chuan an sawi.

Inthlan result hi district hmunpui tina media centre atanga puan chhuah zel a ni ang a. Aizawla Chief Electoral Officer pisa atangin a belhkhawm puan chhuah zel tum a ni bawk a ni.

&lt;&gt;&lt;&gt;&lt;&gt;

## SEARCH OPERATIONS

Kar kal ta Thawhlejni-a cyclone Remal behbawm ruahpui vanawn sur avanga leiminin a hnawl ruang la hmuh loh 5-te central YMA in a nawlpui a zawn a huaihawt chu naktukah khar a ni ang.

Thu dawn danin Central YMA hruaitute leh chhiat tawk branch YMA hruaitute hi inrawnkhawmin naktuk chawhnu lama a nawl pui a ruang zawn kharna hun hman dan tur an duang ang a. Mizo dana ni 7 zawn a nih tawh dawn avanga a nawl pui a zawn hi khar tur a ni a, zawn chhonzawm zel tho tura ngaih a ni. He chhiatna thlengah hian mi 34 an thi ni a hriat a ni a, an zinga mi 29-te ruang chu lak chhuah a ni a, Melthum ami ruang 4 leh Aibawk ami ruang 1 te la hmuh loh a ni. Melthum ami, leimin an chenna a hnawl vanga la hmuh loh zingah hian naute thla 6 chauhva upa bakah kum 8 mi mipa naupang leh kum 11 mi hmeichhe naupangte an tel a. Aibawk ami hi an nupa a a hnawl kha an ni a, Hortoki khaw bula Tlawng lui a a nupui ruang an hmuh tawh hnu-ah ani ruang hi zawn mek zel a la ni.

Hlimen branch YMA hruaitute hnen atanga thudawn danin an ruang zawnte hi chhiatna thlenna hmun hnai a awm tawh lova ringin a thlang lam lui dang leh Tlawng lui dung thleng a zawn a ni a. Central YMA ruahmanna angin Aizawl veng hrang hrang YMA branch leh chhiatna thlenna veng leh khua bakah an veng leh khaw thenawmte'n ruang zawn hna hi an thawk a ni.

<><><>

## SENTENCE

Aizawl a Special Court (Prevention of Corruption) chuan dik lo taka mipui sum hman a nih chungchangah Chakma Autonomous District Council (CADC) a chairman hlui leh a fapa bakah deputy chairman hlui hremna naktuk hian a puang dawn.

Special judge Dr. HTC Lalrinchhana chuan CADC chairman hlui Kali Kumar Tongchangya, a fapa Julius Tongchangya leh deputy chairman hlui Purna Muni Chakma te hi Zirtawpni khan eiruk thubuai-ah thiam loh a lo chantir tawh a. Hemi ni vek hian jail-ah thawnin naktukah court-ah a hremna tur a puang dawn a. Kali Kumar Tongchangya hi CADC chairman a nih lai a dan kalha a fapa Julius Tongchangya hna a thun bakah a hlawkna tura thil dik lo taka ti a puh a ni a. Heta hmanraw tangkai tak Purna Muni Chakma leh dik lo taka mipui sum ama mimal hlawkna atana hmangtu Julius Tongchangya te chu court hian thiam loh a chantir a ni.

He thubuai hi April 9, 2019 a Bangalore a hmunpui nei United Chakma Alliance (UCA) vice president Pu Udondi Chakma in Mizoram Lokayukta a a thu thehluh, mipui sum dik lo taka hmanga Kali Kumar Tongchangya a puhna atanga lo intan a ni a. Lokayukta hian ACB hnenah pe-in thubuai hi kum 2021 atang khan chhui tan a ni. KK Tongchangya hi a fapa Julius Tongchangya, khatih lai a Doon Uttarakhand khawpui Dehradun a PG College of Agriculture Science and Technology-a B.Sc. (Horticulture) a zir lai a, a PA atana la-ah puh a ni a. A taka thawk si lovin chawlh pe chungin hlawh a la reng a. Thawk hauh lova a hlawh lak hi a vaiin cheng nuai 17, sing 3 sang 5 leh 183 a ni.

Hei bakah hian Julius Tongchangya ta 'Julius Fish Seeds Production Center', Udalthana-I chu sangha chi nuai 25 supply order cheng nuai 50 man CADC in an pe a. Sangha chi hi nuai 17 chauh, cheng nuai 34 supply si-in cheng nuai 50 hi pek vek niin Actual Payee Receipt-ah chuan tarlan a ni.

Hei bakah hian leilet siamna atan Julius Tongchangya hi cheng nuai 1 leh sing 6 contract pek a ni bawk a . Deputy chairman hlui Purna Muni Chakma hi Julius Tongchangya hna a thuntu leh chawlh phalsaktu a ni a. KK Tongchangya hi ama fapa ngei sum tam taka hlawkna a neih theihna atana tha thawhtu a ni, tiin court chuan thiam loh a chantir a ni.

<><><>

#### MONSOON SETS IN

Indian Meteorological Department, Ministry of Earth Sciences, Govt. of India-in thu a chhuah danin State dangte rualin Mizoramah pawh fur a lo intan ta a, ruah pawh tam tham tak sur thei reng dinhmunah a ding mek ani.

Chhiatna laka mitin an him theih na'n chhung tinte mahni chenna ni leh a velte leimin theng palh thei a awm em tih uluk taka lo thlithlai reng turin sorkar chuan a ngen a. Mahni in bul hnaia tui luankawr te leh tuichhe paihna te tha lo lai a awm a nih chuan rang taka siam tha zel turin a ngen bawk a ni. Tuichhe paihna leh inchung atanga tui khawh thlakna (drain pipe)-te mahni in bul lui kawr a thleng ngei ngei tur a ni a, in bul lei charah a tawp ringawt tur a ni lo, tiin sorkar thupuan chuan a sawi a. Sawrkar Department tinte pawh mahni Department building theuhte uluk taka lo thlithlai a lo enfiah reng turin a ngen a ni..

Chhiatna thleng palh a harsatna tawkte chuan mahni District Emergency Operation Centre (DC Office) theuhte rang taka hriattir turin sorkar chuan a ngen bawk a ni.

<><><>

#### WORLD RECORD

Saitual khaw naupang Samuel Lalbiakhlua kum 11 chu International Book of Records chuan khawvela paragliding pilot naupang berah tunhnai khan a puang. Samuel Lalbiakhlua hian khawvel hriat thamin kumin March ni 16 khan khawvel pum huapa paragliding tihna hmun sang ber dawttu leh Asia khawmualpui a sang ber, Himachal Pradesh a Bir Billing-ah bul a tan a. Mizoram Paragliding Association hruaitu Pi Varte Zaithanmawii kaihhruaina hnuai-ah India ram chanchinbu liante chuan a chanchin hi an ziak chiai chuai tawh a ni. A hlawhtlinna hi a namai lo hle a, ni 6 chhung zet nasa taka a inpuahchah hnu-ah hetiang hi a lo ni chho ta a ni. Kg 35 leka rit a nih avangin an hotute ngaih a tha chiah lo na a, hlah nei lo leh hrat khawkheng a nih avangin hetiang dinhmun hi a thleng thei a ni. Pi Zaithanmawii chuan Guinness Book of World Records a a lan theihna turin an buaipui leh mek niin a sawi a ni.

<><><>

#### ARUNACHAL & SIKKIM ASSEMBLY ELECTION RESULTS

Arunachal Pradesh leh Sikkim assembly inthlana vote tlate, vawiin khan chhiar a ni a, Arunachal Pradesh-ah BJP-in sorkarna an siam dawn a, Sikkim-ah rorellai Sikkim Krantikari Morcha (SKM)-in thuneihna an chang zui dawn.

Lok Sabha inthlanpui thawh khatna, April ni 1-a neih rual khan heng state 2 assembly inthlan hi neih a ni a, Seat 60 awmna Arunachal Pradesh-ah hian bial 10-ah BJP candidate-te chu chuhtu awm lova tlingah puan an lo ni tawh a, chuh puitu awm lova tling zingah hian Chief Minister, Pema Khandu leh Dy. Chief Minister, Chowna Mein-a te an tel a ni.

Vawiina seat 50 result puanah BJP-in seat 36 an hui a, People's Party of Arunachal (PPA)-in seat 5, Nationalist Cong Party leh Independent-ten seat 3 ve ve la-in Indian National Cong-in seat 1 an la a ni. Tling langsar zual zingah Union Minister hlui Ninong Ering, party hruaitu Dr Mahesh Chai, Tai Nikio, Homchun Ngamdang, Wangling Lowangdong, Tsering Lamu leh Chakat Aboh-te an tel a, hetih lai hian Doimukh bialah People's Party of Arunachal candidate, Nabam Vivek-an bialtu BJP MLA, Tana Hali Tara a hneh a, Mebo bialah pawh PPA candidate Oken Tayeng-a'n bialtu nilai BJP candidate a hneh a ni.

Assembly seat 32 awmna, Sikkim assembly inthlanah rorellai Sikkim Krantikari Morcha (SKM)-in seat 31 an hui a, a bak seat 1 chu Sikkim Democratic Front-in an chang a ni. Chief Minister ni lai, SKM President, Prem Singh Tamang-a chu Rhenock leh Soreng Chakung bialah a tling ve ve a, SDF President, Chief Minister hlui Pawan Kumar Chamling-a pawhin bial 2 - Poklok Kamrang leh Namcheybung chuh kawpin a tling zo lo ve ve a ni.

<><><>

#### REVIEW MEETING ON CYCLONE REMAL

Cyclone Remal tleh avanga chhياتna thlen dan, Prime Minister Narendra Modi-a hovin vawiin khan New Delhi-ah thlirlet a ni a, Mizoram, Assam, Manipur, Meghalaya leh Tripura-a leimin leh tuilian vanga thihna leh tawrhna thlen dante sawiho a ni.

Prime Minister chuan sorkar laipuiin thlipui tuartu state-te a chhawmdawl zel dawn tih a sawi a, Home Affairs Ministry chu chhياتna thlenna hmuna chhawmdawl hna thawh dan, uluk taka vil turin a hriattir bawk.

He thutkhawmah hian Principal Secy to Prime Minister, Cabinet Secy, Home Secy, Earth Sciences Ministry, NDRF DG leh Member Secy leh NDMA aiawhte bakah PMO leh Ministry hrang hrangah official pawimawhte an tel a ni.

<><><>